

# LEOPOLD VIDAU

## *DE LA DURÈNÇO IS AUPIHO*

*Amo de-longo renadivo,  
Amo jouiouso e fièro e vivo,  
Qu'endihs dins lou brut dóu Rose e dóu Rousau!  
Amo di sèuve armouniouso  
E di calanco souleiouso,  
De la patrio amo piouso,  
T'apelle! encarno-te dins vers prouvènçau!*

**F. MISTRAL** (CALENDAU, cant Ié)

## PREFÀCI

Moun brave Vidau,

Me demandas uno Prefàci! — Recule autant davans l'obro que counsisto à presenta poumpousamen l'autour d'un libre, à lou counsacra 'm'uno retourico de pedant, coume recule davans li cop d'encensié e la lausenjo melicouso.

Sian tóuti louja à la memo ensigno, moun brave Vidau, sian tóuti, li bon Felibre, sus lou meme front de bataio. " Pèr la lengo e pèr lou païs! " Gès de mèstre au mitan de nautre, mai de bràvi gènt que se sènton de fraire, qu'an lou meme ideau e la memo toco.

Or, *Pèr la lengo e pèr lou païs!* m'es vejaire qu'aquelo deviso nostro la pourrias escrincela sus lou froutoun de voste libre.

Sènso pretencioun, emé lou bon aire dóu pacan — coume amas que vous digon, — emplegas noste roudanian lou mai pur à canta lou cantoun de terro, lou nis ounte sias nascu: Cabano.

Cabano! ô moun bèu nis ounte ai! las dor moun paire!  
Païs di pantai blu, lou pus galant, di caire!  
Mas! brès de mis amour ounte mi fiéu soun na!

E tout voste libre es embauma d'aquel amour, d'aquéu chale souleious qu'es l'estampo de la raço.

Dis Aupiho à la Durènço, Proumenas voste estrambord, quouro sus lou Ventour, Superbe e fièr simbèu de la noblo patrio, quouro long de la Durènço, sus lou pont de Bonpas; un jour au Castelas di Baus, un autre à Roumanin, talo l'abiho que fai soun mèu, acampas lis impressioun pouëtico e li tremudas en vers esmòugu. E vaqui mai uno flour nouvello espelido au campèstre prouvençau, e vaqui mai un testimòni qu'es coume la voues de la terro simplamen e noublamen s'aubourant pèr dire la joio de viéure urous au siéu, dins la pas de soun vilage e la bèuta de sa terro.

Vai, moun brave Vidau, vòsti vers, manco pas d'espelugaire que li trouvaran belèu pas proun castiga. Leissas dire! I'avès mes touto vosto amo, vosto amo bono e sensiblo, vosto amo vibrant coume uno amo d'enfant, leissas dire! Aquelo qualita vostro de sincerita e d'emoucioun es bèn pus auto e bèn pus rare que la qualita di fasèire de vers sènso cor, sènso estrambord... e sènso deco!  
M'an di qu'erias jardinié, m'estouno plus! Vòsti vers espelisson coume de flour. Ome tres fes urous! La terro flouris souto vòsti man, la pouësio dóu cor flouris sus vòsti bouco.

**Valèri BERNARD**

+ + + + + + + + + + +